



Na osnovu člana 15. Zakona o principima lokalne samouprave („Službene novine Federacije BiH“ broj 49/06 i 51/09), članova 38 i 118. Statuta Općine Trnovo („Službene novine Kantona Sarajevo“ broj 12/08) i Odluke o izvršavanju budžeta za tekuću godinu, Općinski načelnik donio je

**PRAVILNIK
O NAČINU I POSTUPKU ODOBRAVANJA JEDNOKRATNE NOVČANE POMOĆI
LICIMA U STANJU SOCIJALNE POTREBE**

Član 1.

Ovim pravilnikom utvrđuju se uslovi, korisnici, način i postupak ostvarivanja prava na dodjelu jednokratne novčane pomoći, koja se dodjeljuju licima u stanju socijalne potrebe na području općine Trnovo.

Prava iz stava 1. ovog člana ostvaruju se u skladu sa ovim Pravilnikom i planiranim i raspoloživim sredstvima u budžetu općine Trnovo.

Član 2.

Pravo na jednokratnu novčanu pomoć, u skladu sa ovim Pravilnikom mogu ostvariti lica ili članovi njihove porodice u slučajevima kada ne postoji mogućnost da po nekom drugom osnovi ili propisu ostvare to pravo, ili kada je potrebno, na principu solidarnosti, pomoći u zaštiti života ili zdravlja lica koja se nalaze u stanju socijalne potrebe a njihove materijalne i druge prilike ne mogu obezbjediti prevazilaženje trenutne situacije u kojoj su se zatekli.

Član 3.

Licima u stanju socijalne potrebe u smislu člana 1. ovog Pravilnika, smatra se trajno ili privremeno stanje u kojem je građaninu ili njegovoj porodici neophodna pomoć društvene zajednice da bi savladao trenutne vlastite materijalne prilike koje ugrožavaju minimalne standarde življenja, kada na osnovu svojih materijalnih mogućnosti ne mogu obezbjediti zaštitu ugroženog života ili zdravlja, odnosno kada im je usljed teške materijalne situacije potrebna novčana pomoć.

Član 4.

Jednokratna novčana pomoć može se odobriti u maksimalnom iznosu do 200,00KM, po jednom zahtjevu.

Izuzetno, može se odobriti iznos veći od 200,00 KM u slučaju izuzetno teške materijalne situacije.

Član 5.

Jednokratna novčana pomoć može se odobriti licima koja imaju prebivalište najmanje jednu godinu dana na području općine Trnovo i koja su se usljed različitih društvenih i prirodnih okolnosti ili vanrednih prilika zadesila u stanju socijalne potrebe.

Izuzetno od predhodnog stava ovog člana, općinski načelnik može dodjeliti jednokratnu

pomoć i licima koja imaju prebivalište na području druge općine u koliko se dokaže stanje iz člana 3. ovog Pravilnika.

Član 6.

Dodjela jednokratne novčane pomoći u smislu odredaba ovog Pravilnika vrši se na osnovu pismenog zahtjeva lica u stanju socijalne potrebe ili člana njegove uže porodice, uz koji je potrebno priložiti:

- a) ovjerena kopija lične karte ili CIPS- prijava prebivališta,
- b) dokaz o primanjima (da je na evidenciji BIRO-a za zapošljavanje, uvjerenje da nema primanja, ček od penzije),
- c) ovjerenu kućnu listu,
- d) tekući račun,
- e) druge dokaze sa kojima raspolaže podnosilac zahtjeva.

Zahtjev iz predhodnog stava sa potrebnom dokumentacijom, podnosi se Općinskom načelniku putem nadležne Općinske Službe na propisanom obrascu koji je sastavni dio ovog pravilnika (u daljem tekstu: Služba)

Član 7.

Po zahtjevu za dodjelu jednokratne novčane pomoći licima u stanju socijalne potrebe odlučuje Općinski načelnik zaključkom, na prijedlog Komisije za dodjelu jednokratne novčane pomoći licima u stanju socijalne potrebe (u daljem tekstu:Komisija), u skladu sa odredbama ovog Pravilnika.

Komisija ima pravo i obavezu da po službenoj dužnosti, tamo gdje je potrebno i moguće, pribavi isprave i dokaze o činjenicama i okolnostima od značaja za odlučivanje o osnovanosti zahtjeva za odobrenje pomoći prema uslovima predviđenim ovim Pravilnikom.

Izuzetno od predhodnog stava ovog člana, odluku o dodjeli jednokratne novčane pomoći licima u stanju socijalne potrebe može donijeti Općinski načelnik bez mišljenja Komisije.

Član 8.

Komisiju iz člana 7. ovog Pravilnika, imenuje Općinski načelnik. Komisija se sastoji od predsjednika i 2 člana, od kojih je jedan član zdravstveni radnik iz JU Doma zdravlja Trnovo, a dva člana uposlenici Jedinistvenog organa uprave općine Trnovo o čemu će se donijeti posebno rješenje.

Član 9.

Komisija razmatra prispjele zahtjeve i predlaže isprave i dokaze radi provjere ispunjenosti uslova iz člana 6. ovog Pravilnika

Ako na osnovu utvrđenih činjenica, povodom podnesenog zahtjeva, komisija utvrdi da nema osnova za odobrenje jednokratne novčane pomoći, predlaže da se takav zahtjev odbije kao neosnovan.

U slučaju da zahtjev ne ispunjava uslove za dodjelu jednokratne novčane pomoći ili ne sadrže potrebnu dokumentaciju iz člana 6. ovog Pravilnika, Općinski načelnik pismeno obavještava podnosioca zahtjeva o odbijanju istog.

Član 10.

Nakon razmatranja zahtjeva Komisija izvještaj i prijedlog, putem nadležne općinske Službe, dostavlja Općinskom načelniku, koji zaključkom odlučuje o odobravanju jednokratne novčane pomoći za ove namjene.

Komisija je ovlaštena da u slučaju potrebe može vršiti sve vrste provjera priloženih dokaza na kojima lice zasniva opravdanost svog zahtjeva.

Član 11.


Pravilnik o uslovima i postupku za odobravanje jednokratne novčane pomoći licima u stanju socijalne potrebe stupa na snagu danom donošenja i bit će objavljen na oglasnoj ploči općine Trnovo i službenoj Web stranici općine Trnovo.

Član 12.

Stupanjem na snagu ovog Pravilnika prestaje da važi Pravilnik o načinu i postupku odobravanja jednokratne novčane pomoći licima u stanju socijalne potrebe br. 02-05-334 od 23.01.2019.godine.

Član 13.

Ovaj Pravilnik stupa na snagu narednog dana od dana objavljivanja na oglasnoj ploči općine Trnovo.


Broj: 02-04-1247
Trnovo, 27.03.2023